

天一閣藏明代方志選刊

天一閣藏明代方志選刊

黃巖縣志

EP56/18

一九六三年七月上海古籍
書店據寧波天一閣藏明萬
曆刻本景印原書版框高一
九·八公分寬一四·〇公分

黃巖縣志序

古昔畫地置侯秦始罷侯置令今之
令古諸侯也諸侯守在四境舉境內
而疆理之載筆特書具有圖籍春秋
在魯晉楚先焉志之屬也

高皇帝大一統分部而概志之區別
陳則有司在迄今或志或不豈分土

言前集卷之六
殊哉大都令至屢遷每病不暇暇矣
病不徵非志之難得其人為難非得
人之難得其時為尤難矣

今天子絜令萬國持文任以受成功庶
尹優優皆得緣文學以飭吏治故者
更始亡者開先則其時也袁令君治
黃巖者五稔治具畢張公暇則帥縣

文學諸生為黃巖縣志草既具歲當
質成令君自言即黃巖何敢望三都
顧司馬不負玄晏司馬序矣昔黃帝
神遊而求至道台州乃當華胥氏之
陽至武德而郡始名則遊方之外者
也黃巖為郡巖邑至天授而邑始名
民靜而安俗樸而儉問閭禮讓不恩

官司概諸華胥氏之隣則方內矣及
文公以行部至彼都人士北面得師
遵海而南蔚為鄒魯當宋不祚相與
蹈東海以從首陽我

明天造未寧諸耆舊率以赤心而連九
族章縫俎豆斐然鄉風既襲承平善
俗第靡比歲壬子不保都鄙鄉遂為

墟丁夫釋耒而即戎中人破產而趨
末麻一蓬百寧詎能不扶而直哉善
乎令君之言今之凋敝則反朴之資
也顧民不虛偃風在長民前事之不
忘後事者之師也語曰視已成事其
謂志與志為卷者七為綱者五為目
者五十有三有分土而後有分民故

首興地乃若設地險以固吾圉興水利以粒吾民懲往開來當事者之所汲汲者也政由俗革故惟風俗為詳食貨者土之實民之天也故次之王者設官以為民官師備而政教興矣故次職官人傑地靈則地以人取重故次人物由古蹟而之祥異亦旁綜

者所不遺故以外志附之則天明因
地利刑民俗作人文一操牘而四者
得矣其斯以為長民者觀也今人與
居古人與稽粵鑄燕函毋失其舊其
斯以為都人士觀也信斯志也不亦
有徵乎哉令君得聞不佞之言咕咕
自喜應祺不令冒然懸書邑中代斲

之謂何何所藉手幸得一當司馬即
侯萬戶何加焉行且質之職方其藉
司馬為紹介於是置之首簡挾策遂
行

萬曆己卯冬十月朔通議大夫兵部左
侍郎新都汪道昆著



黃巖縣志敘

蓋萬曆乙亥冬杪不佞分符巖邑甫下車
即詢於衆曰若邑志有存乎前蒞茲土者
某也踰某也墨某也政酌寬嚴之間惟去
其太甚某也壹意操切以是賈譽餌蔽庶
不佞有所做而懲云廼邑父老子弟逡逡
答曰志無無何諮於薦紳大夫膠庠士子
咸默默良久率答曰志無不佞起而謂諸

大夫士子曰邑可無志乎諸大夫士子進
而前曰微志則邑之山川土俗將焉攷國
賦物產將焉稽群僚庶役先賢往喆將何
所品隲哉不佞愀然改容未有以應也徐
而語曰國有史郡邑有志家有譜此鉅典
碩務可謂無關於政教而尠之哉諸大夫
士子即以志請不佞曰余蒞任初公檄爰
書纍纍積也而未清民隱士風黯黯昧也

而未察姑緩之可乎越暮不佞循故事偕
計吏入

覲及復任諸大夫士子再以志請會是秋
地方水為崇橫流洶洶漂民廬舍隴畝穗
粒坳風濤中十而六七不佞則命車履畝
勘其所為漂坳狀尋以其狀上於

當道可其請下蠲卹之令不佞則劬劬勸
勸謀所以賑給拊循者旦夕席不煖也則

邑志寢其議者久之又越暮邑中民無沴
諸大夫士子復以志請不佞曰可可遂謀
於邑博士遴其學絃行飭者牟汝忠符良
永何良臣余子直陳承楠蔡子晟六生集
於公署不佞為之授粲六生据摛郡志博
採羣書彙為一藁呈焉不佞退食之暇字
訂句刪薙其冗飾其俚為卷者七其目凡
五曰輿地曰食貨則山川土俗國賦物產

宛在眉睫可按圖而矚也曰職官曰人物
則群僚庶役先賢往喆判若蒼素可披籍
而評也其它古蹟方伎之屬則編為外志
志卒業即以鋟梓其費則帑藏羨貲前已
請之

當道矣梓畢則薦紳大夫膠庠士子謂不
佞可無一言弁諸簡端不佞方有請於海
內宗工未就先書此以答邑大夫士子

之請且紀歲月爾爾

萬曆七年己卯十月既望

賜進士第知黃巖縣事素應祺文穀甫撰

